



DS  
735  
A2W8  
19--  
V. 43

University of Toronto  
Library  
C 398/62  
ASIAN COLLECTION



御撰資治通鑑

明紀綱目



御撰通鑑綱目三編序  
編年之書奚啻數十百  
家而必以朱子通鑑綱  
目為準通鑑綱目蓋祖  
述春秋之義雖取裁於



司馬氏之書而明天統  
正人紀昭監戒著幾微  
得春秋大居正之意雖  
司馬氏有不能窺其藩  
籬者其他蓋不必指數



矣嘗謂讀書立言之士  
論世為難非如朱子具  
格致誠正之功明治亂  
興衰之故其於筆削鮮  
有不任予奪之私失褒



貶之公者自綱目成而  
義指正大條理精密後  
儒有所依援踵而續之  
由宋迄元釐然方集至  
明代君臣事蹟編緝之



難更倍於諸書蓋明史  
已成於百年之後而世  
變風漓記載失實若復  
遲待將何以繼續編而  
示來許爰亟命儒臣法



朱子通鑑綱目義例增  
損編摩大書以提要分  
注以備言每一卷成呈  
覽朕於幾暇之時御丹  
鉛為之叅定雖於天人




一貫之精微求之能盡  
而惟是謹嚴之義守而  
弗失簡正之旨志而必  
勉書既成羣臣舉唐太  
宗之事為言勉從其請



而為之序

乾隆十一年夏四月朔

御製并書





經筵講官直學士兼知書院院事尋原差張延壽等

勅編次

御撰資治通鑑綱目三編告竣謹奉

表恭

進者竊惟屬辭比事教起於春秋繫月編年法沿於紀  
載世綿千祀史闋百家宋溫國羅衆典以創鴻裁章  
程大備子朱子括羣言以標定論體例彌嚴泊乎成  
化諸儒續有宋元通鑑惟勝國興衰之迹在史官紀  
述之司事雖具於編摩義未昭於筆削秉權衡而不  
爽功之鉅者恒難垂典則於無窮道之明也有待欽  
惟



皇帝陛下以

天亶之聰而遜敏有

日新之德而緝熙教志經考典之功闡稽古右文之治

凝神乙夜縱覽千秋謂纂述相承莫精於綱目而典型具

在獨闕於有明宜遵曩哲之遺規用勒前朝之成迹

於是

親披汗簡

特秉鴻裁貫終始以立常經參異同而衡定案準平繩直

提綱則義極謹嚴縷析條分舉目則事期精覈衷之

正史汰臣僚飾美之詞證以羣編削野稗存疑之說

翦裁枝葉綜括綱維褒誅定而亥鉞施法戒明而丹



青炳揆以考亭之法則

聖合於賢登諸闕里之編則經尊於史昔者通史緝於梁  
后徒侈辭華晉書斷自唐宗無關體要未有

乾心作範

審式裁模昭懲惡勸善之方闡守經達權之教藻鏡開而  
天地朗奉以無私璇衡正而古今平歸其有極信聖  
人之述作極盛於茲蓋天下之文章莫大乎是臣等  
叨陪綴緝預列參稽學史而未擅三長受經而漸窺

五體稟

訓言以成統貫多愧專門承  
指授以悟淵微竊欣盛遇伏願



天文光被

淵鑒宏開布在冀宮登之冊府踵麟編而高步藻耀六經  
俯承史而旁羅衆籍百氏乾坤不朽精華畢貫於羣  
心日月齊懸軌度永垂於奕世謹將

御撰資治通鑑綱目釐爲二十卷繕寫清本裝成兩函謹

奉

表恭

進以

聞

乾隆十年四月十七日大學士

伯臣張廷玉

兵部右侍郎臣王會汾



乾隆四年八月初七日內閣奉

上諭編年紀事之體昉自春秋宋司馬光纂前代諸史爲資治通鑑年經月緯事實詳明朱子因之成通鑑綱目書法謹嚴得聖人褒貶是非之義後人續修宋元綱目上繼紫陽與正史紀傳相爲表裏便於檢閱洵不可少之書也今武英殿刊刻明史將次告竣應仿朱子義例編纂明紀綱目傳示來茲著開列滿漢大臣職名候朕酌派總裁官董率其事其慎簡儒臣以任分修及開館編輯事宜大學士詳議具奏特諭欽此



*[The page contains extremely faint, illegible vertical columns of Chinese text.]*



御撰資治通鑑綱目三編總目錄

第一卷

凡五年

起戊申元順帝至正二十八年明太祖洪武元年盡壬子明太祖洪武五年

第二卷

凡十四年

起癸丑明太祖洪武六年盡丙寅明太祖洪武十九年

第三卷

凡十二年

起丁卯明太祖洪武二十年盡戊寅明太祖洪武三十一年

第四卷

凡十一年

起己卯明惠帝建文元年盡己丑明成祖永樂七年

第五卷

凡十六年

起庚寅明成祖永樂八年盡乙巳明仁宗洪熙元年



第六卷

凡十八年

起丙午明宣宗宣德元年盡癸亥明英宗正統八年

第七卷

凡十三年

起甲子明英宗正統九年盡丙子明景帝景泰七年

第八卷

凡十四年

起丁丑明英宗天順元年盡庚寅明憲宗成化六年

第九卷

凡十七年

起辛卯明憲宗成化七年盡丁未明憲宗成化二十三年

第十卷

凡十八年

起戊申明孝宗弘治元年盡乙丑明孝宗弘治十八年

第十一卷

凡十六年



第十二卷

起丙寅明武宗正德元年盡辛巳明武宗正德十六年

凡十四年

第十三卷

起壬午明世宗嘉靖元年盡乙未明世宗嘉靖十四年

凡十七年

第十四卷

起丙申明世宗嘉靖十五年盡壬子明世宗嘉靖三十一年

凡二十年

第十五卷

起癸丑明世宗嘉靖三十二年盡壬申明穆宗隆慶六年

凡二十年

第十六卷

起癸酉明神宗萬曆元年盡辛卯明神宗萬曆十九年

凡二十一年

起壬辰明神宗萬曆二十年盡壬子明神宗萬曆四十年

凡二十一年



第十七卷

凡八年

起癸丑明神宗萬歷四十一年盡庚申明光宗泰昌元年

第十八卷

凡七年

起辛酉明熹宗天啓元年盡丁卯明熹宗天啓七年

第十九卷

凡九年

起戊辰明莊烈帝崇禎元年盡丙子明莊烈帝崇禎九年

第二十卷

凡七年有奇

起丁丑明莊烈帝崇禎十年盡甲申明莊烈帝崇禎十七年五月



御撰資治通鑑綱目三編卷一

起戊申元順帝至正二十八年明太祖  
凡五年

戊申

元順帝至正二十八年。明太祖高皇帝洪武元年。是歲閏七月。元帝出奔。春正月。吳相國李

善長等尊吳王朱元璋為皇帝。國號明。

元璋先世家沛。徙句容。再徙泗州。父世珍始徙濠之鍾離。母陳氏。元璋始生。室中數有光起。比長。姿貌雄傑。志意廓然。年十七。父母相繼歿。孤無所依。乃入皇覺寺為僧。至正十二年。從郭子興於濠州。子興奇其狀貌。留為親兵。戰輒勝。明年。收里中兵。得七百人。子興署為鎮撫。與徐達、湯和等略定遠。下滁州。得李善長與語。大悅之。留掌書記。十五年。子興卒。劉福通立韓林兒於亳。檄元



瑋爲副元帥不受。遂渡江拔牛渚。下太平。取集慶路。以次略定江左。二十四年。自立爲吳王。建百官。遂降陳理。執張士誠。走方國珍。盡有淮南浙東江西荆楚地。二十七年。命諸將北定中原。善長帥百官勸進。乃以是年春正月乙亥祀天地於南郊。卽皇帝位。建元洪武。

追尊祖考爲皇帝。

高祖考曰元皇帝。廟號德祖。曾祖考曰恒皇帝。廟號懿祖。祖考曰裕皇帝。廟號熙祖。考曰淳皇帝。廟號仁祖。妣皆皇后。

立妃馬氏爲皇后。世子標爲皇太子。

后郭子興撫女也。仁慈有智鑒。好書史。帝旣定江南。吳



漢接境。戰爭無虛日。后手緝甲士衣屐佐軍。嘗言治天下以不殺人爲本。帝善之。既卽位。欲官后族。后謝曰。爵祿私外家。非法。力辭而止。乃追封后父馬公徐王。修墓置廟標。后長子也。

以李善長爲左丞相。徐達爲右丞相。

善長少習法家言。有智計。帝嘗從容問曰。四方戰鬪。何時定乎。對曰。漢高祖起布衣。豁達大度。知人善任。五載成帝業。今元綱旣紊。天下土崩瓦解。公濠產距沛。不遠山川。王氣公當受之。法其所爲。天下不足定也。帝稱善。諸將來歸者。善長察其材。言之。帝復爲帝布欸誠。使皆得自安。帝深倚之。自將征討。皆命居守。轉調兵餉無乏。



嘗請立茶鹽法斟酌元制去其弊政用益饒而民不困  
帝稱吳王時拜右相國至是改官制尙左以爲左丞相  
征南將軍湯和克福建元平章陳友定死之

友定守閩帝命和由明州海道取福州胡美由江西趨  
杉關而別遣使至延平招友定友定置酒會諸將殺使  
者瀝血酒中與衆酌飲之誓以死守已聞杉關破急分  
軍爲二以一軍守福而自帥一軍守延平和舟師抵福  
之五虎門蟻附登城守將遁去參政尹克仁宣政使朶  
耳麻不屈死僉院柏帖木耳殺妻女縱火自焚死時胡  
美已克建寧和遂進攻延平友定欲以持久困之諸將  
請出戰不許數請不已友定疑其部將殺一人軍士多



出降者會軍器局災城中敵聲震地明師知有變急攻之友定呼其屬與訣退入省堂仰藥死所部開門納明師昇友定出水東門未絕也天大雷雨友定復甦械送京師入見帝詰之友定厲聲曰國破家亡死耳尙何言遂併其子殺之延平既下與化泉州皆望風附獨漳州路達魯花赤迭里彌實自殺時稱閩有三忠謂友定柏帖木耳迭里彌實也。

元削擴廓帖木兒爵邑命衮魯李思齊討之。

元旣奪擴廓帖木兒兵分隸諸將擴廓退軍澤州元帝知擴廓勢孤乃詔李思齊等東出關與顏高合攻擴廓而令關保以兵戍太原擴廓憤甚引軍據太原盡殺朝

延所置官吏。於是元帝下詔削擴廓官爵。令諸將四面討之。

三月修女誡。

帝謂翰林學士朱升等曰。治天下以正家爲先。正家之道始於謹夫婦。后妃雖母儀天下。然不可俾與政事。嬪嬙之屬。不過備職事。侍巾櫛。恩寵或過。則驕恣狠分。上下失序。歷代政由內出。鮮不爲禍。惟智者能察之。於夫然。其禁進女誡。及占賢后妃事。可爲法者。使子孫知所持守。

夏四月。蘄州進竹簞。却之。  
令四方無妄有獻。



征南將軍廖永忠取廣東。

永忠自福州以書諭元行省左丞何真曉譬利害真卽奉表迎降。永忠至廣州降盧左丞。禽海寇邵宗愚數其殘暴斬之。廣人大悅。馳諭九真。日南朱崖儋耳三十餘城皆納印請吏。又遣陸仲亨略定清遠英德連州廣東悉平。

征虜將軍徐達常遇春大破元兵於洛水北。元梁王阿魯溫以河南降。

徐達下山東。會遇春於濟寧。引舟師沂河趨沐梁。守將李克彝走。左君弼竹貞等降。遂自虎牢關入。元守將脫因帖木兒以兵五萬陳洛水北。遇春單騎突陳。元兵二

十餘騎攢槊刺之。遇春一矢殪其前鋒。大呼馳入。元兵大潰。追奔五十餘里。梁王阿魯溫降。嵩、陝、陳、汝諸州次第略定。帝如汴梁。改爲開封府。召徐達至行在。命率師北伐。諭之曰：「中原之民久爲羣雄所苦。故命將北伐。拯民水火。元祖宗功德在人。其子孫罔恤民隱。天厭棄之。君實有罪。民則何辜？前代革命之際。肆行屠戮。朕實不忍。諸將毋肆焚掠。妄殺人民。元之宗戚咸俾安全。庶幾上答天心。下慰民望。達頓首受命。帝尋還應天。

都督馬勝克潼關

師取河南。元李思齊、張思道會兵駐潼關。火焚思道營。思齊移軍葫蘆灘。明師攻潼關。思齊奔鳳翔。思道奔鄭。



城。

六月平章楊瑄克廣西。

瑄攻永州。元將鄧祖勝斂兵固守。瑄分營築壘道浮橋。西江急攻之。祖勝力盡仰藥死。遂克永州。以次定寶慶。全州。道州。藍山。諸州縣。進攻靖江。不下。瑄謂諸將曰。彼所恃西濠水耳。決其堤岸。破之必矣。乃遣將殺守堤兵。盡決濠水。築土堤五道。傳城攻。兩月會廖永忠。朱亮祖。自廣東取梧州。定潯。桂。鬱林。亮祖以兵來會。其總制張榮來約降。瑄與之白幘。為識。夜半從寶賢門入。執元平章也兒吉尼。移師郴州。降雨江土官黃英。岑伯顏等。永忠亦定南寧。象州。廣西悉平。

秋閏七月。元復擴廓帖木兒官爵。命率師會諸將復河洛。  
○明師克通州。元帝奔上都。八月。徐達入元都。元監國淮  
王帖木兒不花死之。

徐達帥師發開封。遣裨將守道徇河北地。連下衛輝彰  
德廣平。次臨清。使傅友德開陸道。通步騎。顧時浚河通  
舟師。會常遇春已克德州。合兵取長蘆。扼直沽。作浮橋。  
濟師水陸並進。大敗元軍於河西務。進克通州。知樞密  
院事卜顏帖木兒力戰被禽。死之。元帝詔淮王帖木兒  
不花監國。以慶童爲左丞相。同守京城。遂御清寧殿。集  
三宮后妃皇太子。議避兵。北行。左丞相失列知樞密院  
事黑厮宜者趙伯顏不花以爲不可。帝不聽。伯顏不



花慟哭曰天下者世祖之天下。陛下當以死守。奈何。乘之卒不聽。夜半。開建德門北去。達陳兵齊化門。將士填濠登城。入淮王及左丞相慶童平章迭兒必失。朴賽因不花右丞相張康伯御史中丞滿川等不降。殺之餘不戮一人。封府庫及圖籍寶物。令指揮張勝以兵千人守宮殿門。使宦者護視。宮人妃主禁士卒毋侵。暴吏民安堵。捷聞。詔示天下。以大都路爲北平府。置六衛。留都督副使孫興祖守之。右丞薛顯叅政傅友德巡古北諸隘。

口

以應天爲南京。開封爲北京。始建六部。

中書省初設四部。掌錢穀禮儀刑名營造之務。至是置

吏戶禮兵刑工六部設尙書侍郎等官。

大赦

詔赦殊死以下。恤從征將士家。逋卒許自首。輸賦道遠者。官爲轉運。災荒以實聞。避亂民復業者。聽墾荒地。復三年。衍聖公襲封。及授曲阜知縣。並如前代制。有司以禮聘致賢士。毋非時決重囚。除書籍田器稅貸逋賦。蒙古色目人有材能者。許擢用。鰥寡孤獨廢疾者。存恤之。民年七十以上。復一子他利害。當興革。不在詔內者。有司具以聞。

帝如北京。○放元宮人。○江西行省叅政陶安卒。

安博涉經史。帝渡江時。安首謁軍門。陳王道。吳元年徵



諸儒議禮命安爲總裁官諸禮率多安所裁定至是卒追封姑孰郡公

冬十月帝還南京。十一月遣使訪求賢才。十二月徐達克太原。元擴廓帖木兒走甘肅山西平。

達既定元都進取山西常遇春先下保定中山真定馮勝湯和下懷慶度太行取澤潞擴廓遣將來禦戰於韓店楊璟大敗會元帝自開平命擴廓復大都擴廓乃引兵出雁門由居庸以攻北平達聞之謂諸將曰擴廓遠出太原必虛北平有孫都督足以禦之今乘敵不備直擣太原所謂批亢擣虛者也彼若還救太原進退失據必成禽矣諸將皆曰善乃率師趨太原擴廓至保安聞

之。果還救遇春謀於達曰。我騎兵雖集。步卒未至。驟與戰。必多殺傷。若夜襲之。可得志。達然之。會擴廓將豁鼻馬來約降。請爲內應。達夜選精騎襲其營。擴廓方燃燭治軍書。倉卒不知所出。跌一足。乘驢馬從十八騎遁。豁鼻馬降得甲士四萬。遂克太原。乘勢收大同。分遣馮勝等。狗猗氏。平陽絳州。禽其守將。榆次平遙介休以下。山西悉平。

明太祖高皇帝洪武二年春正月。立功臣廟。

帝親定功臣位次。以徐達爲首次。常遇春。李文忠。鄧愈。湯和。沐英。胡大海。馮國用。趙德勝。耿再成。華高。丁德興。俞通海。張德勝。吳良。吳楨。曹良臣。康茂才。吳復。茅成孫。



興祖凡三十一人立廟雞鳴山下死者像祀生者虛其位又以廖永安俞通海張德勝桑世傑耿再成胡大海趙德勝七人配享太廟

免山東北平山西河南及畿內諸郡田租。倭寇山東。二月詔修元史。

大都既克得元十三朝實錄乃詔修元史以左丞相李善長監修前起居注宋濂漳州府通判王禕爲總裁徵山林隱逸之士汪克寬胡翰陶凱曾魯高啓趙訪等十六人爲纂修閱六月書成而元統以後之史未備乃命儒士歐陽祐等往北平採遺事明年續修仍以濂菴總其事帝召元舊臣問元政得失馮益對曰元有天下以

寬得之亦以寬失之帝曰但聞寬則得衆未聞以寬失者也夫步急則躓弦急則絕民急則亂居上正當用寬元季君耽於逸樂其失在於縱弛實非寬也聖王之道寬而有制不以廢事爲寬簡而有節不以慢易爲簡迨中則無弊矣

元丞相也速侵通州平章曹良臣擊走之

大軍徇山西北平守備單弼曹良臣守通州兵不滿千人也速將萬騎營白河良臣曰吾兵少不可與戰當以計走之乃於瀕河舟中多立赤幟亘十餘里鉦鼓聲相聞也速驚遁良臣出精騎逐北百餘里元兵自是不敢窺北平。



帝耕藉田。○三月。徐達克奉元。常遇春克鳳翔。

元將李思齊據鳳翔。張思道。孔興。脫列伯等。駐鹿臺。以衛奉元。徐達兵入關。思道遁去。郭子興將輕騎直擣奉元。守將棄城走。御史桑哥失里。郎中王可。檢討阿失。不花。三原尹朱春。俱抗節死。遂改奉元路爲西安府。戶賑米三石。民大悅。遇春兵至鳳翔。思齊奔臨洮。

夏四月。命博士孔克仁。授諸子經。

功臣子弟。並令入學。

馮勝徇臨洮。李思齊降。

時張思道弟良臣守慶陽。徐達會諸將議所向。皆曰。張思道之才。不如李思齊。而慶陽易於臨洮。請先慶陽。達

曰不然慶陽城險兵精猝未易拔臨洮西控羌戎北界  
河湟得之其人足備戰鬪物產足佐軍儲蹙以大軍思  
齊不西走則束手就降矣臨洮旣克於旁郡何有遂度  
隴克秦州下伏羌寧遠入鞏昌遣馮勝逼臨洮思齊果  
不戰降。

五月朔日食。○御史中丞章溢卒。

溢初應聘與劉基葉琛宋濂同至應天。帝勞之曰。我爲  
天下屈四先生。今天下紛紛何時定乎。溢對曰。天道無  
常。惟德是輔。惟不嗜殺人者能一之耳。浙東設按察使  
以溢爲僉事。督饋餉平諸寇。數有功。帝卽位與劉基並  
拜御史中丞。時廷臣伺帝意多嚴苛。溢獨存大體。受詔



赴閩擇鄉兵行之處州遭母喪乞終制不許鄉兵卽集  
再乞終制許之哀毀卒帝痛惜親撰文祭之

六月常遇春克開平元帝奔和林

遇春下鳳翔詔還備北平以李文忠副之師步騎九萬  
敗元將江文清於錦州敗也遠於全寧進攻大興州分  
千騎爲八伏守將夜遁盡禽之遂拔開平元帝北走追  
奔數百里獲其宗王慶生平章鼎住等斬之凡得將士  
萬人車萬輛馬三千匹牛五萬頭薊北悉平

秋七月征虜副將軍鄂國公常遇春卒於軍詔李文忠領  
其衆

遇春師次柳河川卒遇春沉鷺果敢善撫士卒摧鋒陷

陣未嘗敗北。雖不習書史。用兵輒與古合。嘗自言能將  
十萬衆。橫行天下。軍中稱常十萬。長於大將軍達二歲。  
聽約束惟謹。一時名將稱徐常。喪歸。帝用宋太宗喪趙  
普故事。臨於龍江。追封開平王。謚忠武。

八月。元兵攻大同。李文忠擊敗之。

文忠會徐達攻慶陽。行次太原。聞大同圍急。謂左丞趙  
庸曰。聞外之事。苟利於國。專之可也。遂出雁門。敗元遊  
兵於馬邑。禽其平章劉帖木。進至白楊門。天雨雪。已駐  
營。文忠令移前五里阻水自固。元兵乘夜來劫。堅壁不  
動。質明。敵大至。以二營委之。殊死戰。敵疲。乃出精兵左  
右擊。大破之。禽其將脫列伯。俘戮萬餘人。窮追至莽母。



倉而還

定內侍官制

諭吏部曰內臣但備使令毋多人馭之之道當使畏法勿令有功有功則驕恣矣

封王顥爲高麗國王○徐達克慶陽禽張良臣斬之陝西平

達自臨洮下蘭州襲走元豫王盡收其部落輜重還出蕭關克平涼張思道懼使其弟良臣守慶陽而自奔寧夏爲擴廓所執良臣以慶陽降達遣薛顯受之已而復叛襲傷顯達督兵圍之良臣求援於擴廓擴廓遣將攻原州陷涇陽爲慶陽聲援達遣馮勝扼驛馬關敗其將

良臣被圍久數出戰不利糧乏絕至煮人汁丸泥嚙之  
守者遂開門降良臣父子俱投井引出斬之時元賀宗  
哲攻鳳翔指揮使金興旺與知府周煥嬰城守敵編荆  
爲大箕形如半舫五人負之攻城矢石不能入投藁焚  
之輒颺起乃置鉤藁中擲著其隙火遂熾敵棄箕走復  
爲地道薄城攻不已會百戶王輅收臨洮降卒還入城  
共守敵拔營去衆欲追之輅曰未敗而還誘我也偵之  
至五里坡伏果發還師復圍城衆欲走輅曰天子  
以城畀我豈可去耶以輅所將皆新附乃括城中貲令  
曰敵退當大犒新兵新兵喜協力固守持十五日敵聞  
慶陽下乃引去



修禮書

明年書成名大明集禮

九月置中都

以臨濠爲中都營城闕宮殿如京師制

冬十月詔天下府州縣皆立學

庚戌

三年春正月遣徐達李文忠分道北伐

時元主尙在近塞而擴廓犯蘭州指揮于光力戰死帝以達爲大將軍文忠及馮勝鄧愈湯和副之分二道出兵達自潼關出西道壽定西取擴廓文忠自居庸出東道絕大漠追元王二月文忠至興和降其守將進兵察罕腦兒禽元平章竹貞次駱駝山走平章沙不丁次開

平降平章上都罕等

吏部請謫有罪於僭崖不許

帝曰前代謂僭崖爲化外以處罪人朕今天下一家若有風俗未淳宜更擇良吏治之豈宜居罪人耶

二月追封郭子興爲滁陽王○夏四月封子九人爲王

棧王泰桐王晉棣王燕櫛王吳楨王楚榑王齊梓王潭杞王趙檀王魯從孫守謙王靖江櫛後改王周

徐達大破元擴廓帖木兒於沈兒峪

達至安定擴廓退屯沈兒峪達進軍薄之隔溝而壘日數交戰擴廓遣精兵千餘人由間道劫東南壘左丞胡德濟倉猝失措軍驚擾達親擊却之德濟大海子也達



械送京師。而斬其下趙指揮等數人以徇。明日。整兵奮  
備。殊死戰。大破擴廓兵。禽郟王濟王。及國公平章以下  
文武僚屬千八百餘人。士卒八萬。擴廓僅挾妻子數人  
奔和林。達遂自徽州南二百八渡。至略陽。克沔州。入連  
雲棧。攻興元。取之。鄧愈亦自歸洮。進克河州。德濟至京  
師。帝釋之。而以書諭達曰。將軍效衛青。不斬蘇建耳。獨  
不見穰苴之待莊賈乎。且將軍在軍中。誅之則已。今下  
廷議。吾且念其信州諸暨功。不忍加誅。繼自今。將軍毋  
事姑息。

元帝殂於應昌。

詔諡之曰順帝。子愛猷識里達臘立。

五月始設科取士。

時以天下初定。令各行省連舉三年。自後二年一舉。鄉試以八月。會試以二月。

李文忠克應昌。獲元買的里八剌送京師。

文忠聞元主卒。督兵兼程進圍應昌。克之。元嗣君愛猷識里達臘北走。獲其子買的里八剌及后妃諸王官屬數百人。窮追至北慶州。而還道興州。禽國公江文清等。降三萬七千人至紅羅山。又降楊思祖之眾萬六千餘人。

是月旱。六月。帝親禱於山川壇。越五日雨。

帝齋於西廡。皇后躬執爨。為農家食。太子詣王饋於齋。



所帝素服草屨徒步詣壇席藁曝日中。夜臥於地。凡三日。詔省獄囚。命有司訪求通經術深明治道者。越五日大雨。

封賈的里八刺爲崇禮侯。

李文忠捷奏至。羣臣稱賀。帝命朝臣嘗仕元者勿賀。賈的里八刺至京師。羣臣請獻俘。帝曰。武王伐殷用之乎。省臣對。唐太宗嘗行之。帝曰。是待王世充耳。若遇隋之子孫。恐不爾也。令以本服朝見。賜冠帶。母妃皆朝中官。賜第龍光山。

立開中鹽法。

山西行省請令商人於大同倉入米一石。太原倉入米

一石三斗。給淮鹽一小引。商人鬻畢。卽以原引赴所在繳之。帝從其請。召商輸糧而與之鹽。謂之開中。其後各行省邊境多召商中鹽。以備邊儲。計道里遠近。自五石至一石有差。

徙蘇。松嘉湖杭民無業者。田臨濠。

凡四千餘戶。給牛種車糧資遣之。三年不征稅。其後復徙北平山後民散處諸府縣。又徙沙漠遺民屯田北平。又徙江南民十四萬於鳳陽。又徙山西民於河北。又屢徙浙西及山西民於滁和。北平山東河南終洪武之世徙民最多。

秋七月。中書右丞楊憲有罪誅。



憲有才辨。裁決明敏。然意刻深。有不足於已者。輒中傷之。在中書。欲盡易省中故事。凡舊吏皆罷去。更用已所親信者。候侍御史劉炳劾罷丞相汪廣洋。且請徙之廣南。帝不從。已復有所論劾。帝覺其誣。下炳獄。炳吐實。遂誅憲。

冬十一月。大封功臣。

進李善長韓國公。徐達魏國公。封李文忠曹國公。馮勝宋國公。鄧愈衛國公。常遇春子茂鄭國公。湯和等侯者二十八人。已又封汪廣洋忠勤伯。御史中丞劉基誠意伯。越三日。諸臣入謝。帝賜坐華蓋殿。從容論取天下之略曰。朕起鄉里。本圖自全。及渡江以來。觀羣雄所爲。徒

爲民害。張士誠恃富。陳友諒恃強。朕獨無所恃。惟不嗜  
殺人。布信義。行節儉。與卿等同心共濟。初與二寇相持。  
士誠尤逼近。或謂宜先擊之。朕以友諒志驕。士誠器小。  
志驕則好生。事器小則無遠圖。故先攻友諒。鄱陽之役。  
士誠卒不能出姑蘇一步。以爲之援。向使先攻士誠。姑  
蘇堅守。友諒必空國而來。吾腹背受敵矣。及北定中原。  
先山東。次河洛。止潼關之兵。不遽取秦隴者。以擴廓帖  
木兒。李思齊。張思道皆百戰之餘。未肯遽下。急之則併  
力。一隅猝未易定。故出其不意。反旆而北。燕都旣舉。然  
後西征。張李望絕。勢窮不戰而克。然擴廓猶力抗不屈。  
向令未下燕都。驟與角力。勝負未可知也。



自正月至十二日。日中屢有黑子。詔求直言。

四年春正月。李善長罷。以汪廣洋爲右丞相。胡惟庸爲左丞。

善長貌寬和而性伎刻。比進封大國意稍驕。帝頗厭之。以疾致仕。初。帝嘗以吏事責善長。劉基言善長勲舊能調和諸將。帝曰。是數害君。君乃爲之地耶。吾行相君矣。基頓首曰。是如易柱。必得大木。若束小木爲之。且立仆。帝又嘗欲相楊憲。憲素善基。基力言不可。曰。憲有相才無相器。夫宰相者。持心如水。以禮義爲權衡而已。不與焉者也。帝曰。汪廣洋何如。曰。褊淺殆甚於憲。又問胡惟庸。曰。璧之類。懼其僨轅也。帝曰。然則無逾先生。對曰。基

疾惡太甚。又不耐繁劇。爲之且孤上恩。天下何患無才。惟明主悉心求之。目前諸人誠未見其可。後憲惟庸廣洋皆敗。如基言。

以湯和爲征西將軍。傅友德爲征虜前將軍。帥師伐夏。

夏主明昇聽吳友仁計。不入朝。帝假道征雲南。不奉詔。且數寇興元。乃命將討之。和帥副將軍周德興。廖永忠等以舟師由瞿塘趨重慶。友德帥副將軍顧時等以步騎由秦隴趨成都。鄧愈督餉給軍。

二月。元平章劉益以遼東降。

詔置遼東衛。以益爲指揮同知。未幾。元平章洪保保馬彥翬等謀殺益。右丞張良佐又殺彥翬。保保走依納哈。



出

夏六月湯和下重慶夏明昇降。

帝之遣和友德也諭之曰蜀人聞我師西伐必悉精銳東守瞿塘北阻金牛若出不意直擣階文門戶旣窺腹心必潰兵貴神速患不勇耳友德疾馳至陝集諸軍聲言出金牛而潛引兵趨陳倉攀援岩谷晝夜行抵階州敗其將丁世珍克其城蜀人斷白龍江橋友德修橋以渡破五里關遂拔文州趨綿州漢江水漲不得渡伐木造戰艦欲以軍聲通瞿塘乃削木爲牌數千書克階文綿日月投漢水順流下蜀守者見之皆解體夏丞相戴壽等急分兵援漢州未至友德已破其守將向大亨於

城下援師膽落友德迎擊大敗之遂拔漢州廖永忠兵至瞿塘阻鐵鎖橋不得進永忠密遣數百人持糗糧水筒舁小舟踰山度關出其上流蜀山多草木令將士皆衣青蓑衣魚貫走崖石間度已至帥精銳出墨葉渡夜五鼓分兩軍攻其水陸寨水軍皆以鐵裹船頭置火器而前黎明蜀人始覺盡銳來拒永忠已破其六寨將士舁舟出江者一時並發上下夾攻大破之遂入夔府明日和始至乃分道進永忠帥舟師直擣重慶昇大懼面縛銜壁輿輓率官屬降於軍門和等承制撫慰之時友德進圍成都身中流矢不退將士殊死戰突其象陣象反走躡藉死者甚衆遂降成都分兵徇州邑蜀地悉定



秋七月。以方克勤知濟寧府。

克勤爲治。以德化爲本。不喜近名。曰。近名必立威。立威必殃民。吾不忍也。時詔民墾荒闕。三歲乃稅。吏不俟期。徵民輒棄田去。克勤稅如期。區田爲九等。以等徵。發吏不得爲奸。立社學數百區。葺孔子廟堂。延名士爲師弟。子繫籍者二千八。盛夏。郡將督民築城。克勤曰。民方耕。柰何。畚鍤重困之。請之中書省。得罷役。會天旱。遂大澍。濟寧人歌曰。孰罷我役。使君之力。孰活我黍。使君之雨。使君勿去。我民父母。

封明昇爲歸義侯。

昇至京。羣臣請帝御殿受俘。如孟昶降宋故事。帝曰。昇

幼弱事由臣下與昶異免其伏地待罪之儀授爵歸義侯賜居第

九月朔日食○設糧長

詔以田多者爲之督其鄉賦稅糧萬石長副各一人輪以時至得召見語合輒蒙擢用其後官軍兌運法行而糧長不廢科斂橫溢滋爲民害其孱弱者復爲勢豪所凌觥延逋負率鬻產以償遂至隕身喪家云

冬十二月逮漢中知府費震尋釋之

震以賢良徵爲吉水知州寬惠得民擢知漢中府歲凶多盜震發倉粟十餘萬石貸民盜聞皆來歸隣境民亦爭赴震各占宅自爲保伍籍之得數千家至是坐事被



逮帝曰良吏也釋之以爲牧民者勸授寶鈔局提舉

五年春正月置親王護衛指揮使司

每王府設三護衛衛設左右前後中五所所千戶二百戶十人

遣翰林院待制王禕使雲南被執不屈死

元梁王把匝剌瓦爾密鎮雲南大都守順帝北去王歲遣使自塞外達元帝行在執臣節如故夏旣平天下大定帝以雲南僻遠難進兵而王所遣漠北使者蘇威適爲北平守將所獲乃命禕齎詔偕威往招諭王待禕以禮會元主遣脫脫微餉雲南知禕在王所疑王有他意脅以危語王不得已出禕見之脫脫欲屈禕禕曰

天既訖汝元命燭火餘燼敢與日月爭明耶我奉使遠來豈爲汝屈遂自刎梁王具衣冠歛之

徙陳理明昇於高麗

或告陳理明昇有怨言帝曰童孺輩言語小過不足問但恐爲小人蠱惑將不能保始終宜處之遠方則隙無自生乃徙高麗

遣徐達馮勝等分道征擴廓帖木兒達軍敗績勝敗元兵而還

帝以擴廓數擾邊命達爲征虜大將軍出雁門趨和林李文忠爲左副將軍出居庸趨應昌勝爲征西將軍出金蘭取甘肅三月達先遣都督藍玉敗擴廓於土門



五月擴廓與賀宗哲合兵拒達於嶺北。達軍敗死者數萬人。勝至蘭州。遣副將軍傅友德前驅。再敗元兵。拔甘肅下。亦集乃路。次別篤山。元岐王朵兒只班遁去。獲其平章長加奴等二十七人。友德復追至瓜沙州。斬獲甚衆。文忠至阿魯渾河。馬中流矢。指揮李榮以所乘馬授文忠。而自奪敵馬乘之。文忠殊死戰。遂破敵。追奔至稱海。椎牛饗士而還。

以鄧愈爲征南將軍。討湖南廣西蠻。

辰豐諸蠻作亂。帝命愈往討。以周德興吳良副之。愈出澧州。討散毛諸洞蠻。德興出南寧。討婪鳳安田諸州蠻。良出靖州。討會同五開潭溪古州諸蠻。悉平之。

二月安南陳叔明弒其王日燧而自立遣使入貢却之。  
叔明纂立懼討遣使入貢以覘朝廷意主客曹已受表。  
主事曾魯取副封白尚書詰使者曰前王日燧今何驟  
更名使者不敢諱具言其實帝曰島夷乃狡獪如是卻  
其貢叔明復遣使謝罪乃命以前王印視事。

置茶馬司

戶部言陝西四川茶宜十取其一以易番馬從之於是  
諸產茶地設茶課司定稅額設茶馬司於秦鞏河雅諸  
州自礪門黎雅抵朶甘烏思藏行茶之地五千餘里西  
方諸部落無不以馬售者。

三月免京民役



應天府言運輸官物悉役京民帝曰京民自開國以來  
勞費倍於外郡今兵革漸息正當休養命免其役未幾  
又賜民絹五匹。

高麗國王遣子弟入國子學。○夏六月作鐵榜戒功臣。○  
冬十一月納哈出寇遼東。○十二月詔百官奏事啓皇太  
子。

御定通御紀上卷

三



御撰資治通鑑綱目三編卷二

起癸丑明太祖洪武六年盡凡十四年  
丙寅明太祖洪武十九年

六年春正月令天下府州縣官入覲

帝諭之曰。慈祥愷悌。身之德也。刻薄殘酷。德之賊也。若  
偽爲慈祥。必無仁愛之實。偽爲愷悌。必無樂易之誠。爾  
等勉之。

選道士供事郊壇。

天地社稷山川香幣。皆令司之。

汪廣洋罷爲廣東行省參政。

時左丞胡惟庸專省中事。廣洋無所建白。故黜之。

二月。停科舉。

帝初以官多闕員舉人俱免會試赴京聽選。又擇其年少俊異者張唯王輝等爲翰林院編修入禁中文華堂肄業。命贊善大夫宋濂等爲之師。帝政暇親品騁其文。日給光祿酒饌。每食皇太子親王迭爲之主。歲時賜賚甚厚。至是以所取多後生少年。有文無實遂罷科舉。別令有司察舉賢才。以德行爲本。文藝次之。其目曰聰明正直曰賢良方正曰孝弟力田曰儒士曰孝廉曰秀才曰人才曰耆民皆禮送京師。不次擢用而各省貢生亦由太學以進。於是罷科舉者十年。

始命御史及按察使考察有司。○三月朔日食。○命徐達帥師鎮山西。○平。○復以魏觀知蘇州府。



觀知蘇州府。政化大行。課績爲天下最。擢四川行省參政。以部民乞留。命還任。

夏六月。元擴廓帖木兒犯雁門。○秋七月。以胡惟庸爲中書右丞相。○九月。定有司季報歲報。

初。府州縣戶口錢糧學校獄訟。每月具書於冊。縣達州。州達府。府達行省。類咨中書。吏牘煩碎。而公私多糜費。又有司決獄。笞五十者。縣決之。杖八十者。州決之。一百者。府決之。徒以上。具獄送行省。或州縣受賕。省府弄法。出入輕重。文移駁議。動多淹滯。帝命中書省御史臺詳議。革月報爲季報。以季報之數。類爲歲報。凡府州縣獄囚。依律斷決。毋俟轉發。其有違枉。御史按察使糾劾。天

下便之。

冬十一月潞州貢人參却之。

帝曰人參得之甚艱毋重勞民往者金華進香米太原進葡萄酒朕俱止之國家以養民爲務奈何以口腹累人。

閏月定大明律。

先是嘗頒律令恐民不能周知命大理卿周禎等爲之直解又令儒臣同刑官講唐律日進二十餘條至是重命刑部尙書劉惟謙詳定大明律篇目皆准於唐損益舊律凡六百有六條。

一年春正月遣將屯田西北。



時河南山東北平陝西山西及直隸淮安諸府雖有屯田。尚未廣。乃命都督僉事王簡等分往諸省經理屯務。明年又命李善長朱亮祖俞通源撫諭諸屯勸課農事。西北田野日闢。屯軍三分守城七分耕作。人授田五十畝。給牛種。教樹植。復租賦。官畝稅一斗。民以不困而軍餉益饒。

遣總兵官吳禎巡海備倭。

倭人頻入寇掠。帝遣使往諭其主良懷。良懷遣僧奉表入貢。未幾寇掠如故。乃以禎充總兵官。都督於顯副之。總江陰四衛軍出海。至琉球大洋。獲其兵船獻俘京師。二月朔日食。○修曲阜孔子廟。

立孔顏曾三氏學教其族人。

三月方國珍卒。

國珍以至正二十七年來降。幕下士詹鼎爲書辭乞哀。甚至太祖憐而赦之。促入朝。授廣西行省左丞。食祿不之官。至是卒。

夏四月都督藍玉拔興和。

時元將脫因帖木兒守興和。玉大敗其衆於白酒泉。擒國公帖里密赤及官屬五十九人。脫因帖木兒棄城走。六月汰北方府州縣官。

帝以北方郡縣民稀事簡。命吏部量減河南北平山東府州縣官三百八人。



陝西雨雹。山西北平河南山東蝗。詔蠲其租。○秋七月李  
文忠拔高州。

斬宗王朶朶失里。禽承旨百家奴。追奔至檀帽山。擊斬  
魯王。獲其妃。及司徒荅海俊等。

九月遣崇禮侯買的里八剌北歸。○冬十一月定服制。

貴妃孫氏薨。敕禮官定服制。禮部尙書牛諒等奏。儀禮  
父在爲母服。菽庶母則無服。帝曰。父母之恩一也。低昂  
若是不情甚矣。命儒臣考定。宋濂等考古人論服。母喪  
者四十二人。願服三年者二十八人。服期年者十四人。  
帝曰。三年之喪。天下通喪。人情所安。卽天理所在。乃定  
制。子爲父母。庶子爲其母。皆斬衰三年。嫡子衆子爲庶

母皆齊衰杖期五服喪制皆有升降。書成。命之曰孝慈錄。頒天下。

高麗李仁任弑其王顓。

顓無子。以寵臣辛肫之子禍爲嗣。於是仁任立禍八年。春正月。詔天下立社學。

帝以郡邑皆有學。而鄉社之民未沾教化。命有司更立社學。延師儒教民間子弟。

河漢開封。

壞大黃寺堤百餘丈。集民夫三萬餘人塞之。

二月。帝耕藉田。三月立鈔法。

時中外各置局鑄錢。有司責民出銅。毀器物輸官。頗以



爲苦而商賈沿元之舊習用鈔多不使用錢乃詔中書省造大明寶鈔其等有六曰一貫曰五百文曰四百文三百文二百文一百文每鈔一貫準錢一千銀一兩禁民間不得以金銀貨物交易違者罪之稅課錢鈔兼收錢什三鈔什七百文以下止用錢

賜德慶侯廖永忠死。

初韓林兒在滁州帝遣永忠迎歸應天至瓜步覆其舟死帝以咎永忠及大封功臣帝曰永忠戰鄱陽忘軀拒敵可謂奇男子然使所善儒生窺朕意邀封爵故止封侯而不公後與楊憲相比憲誅永忠以功大得免至是坐僭侈失人臣禮賜死。

夏四月罷營中都。

帝初欲如周漢制建兩京。至是以勞費罷其役。

誠意伯劉基卒。

基佐帝定天下。工謀畫料事。若神。暇則敷陳王道。帝以此張子房常呼先生而不名。其見重如此。然性剛疾惡。胡惟庸深忌之。初甌括間有隙地。曰談洋。爲鹽。次置藪。基奏立巡檢司守之。奸民弗便也。合逃軍爲亂。吏匿不以聞。基令長子璉奏其事。不先白中書省。惟庸方掌省事。怒使吏許奏。談洋地有王氣。基圖爲墓。道逐居民。以致亂。基坐奪俸。帝初欲相惟庸。基不可。旣而惟庸相。基憂憤疾作。惟庸挾醫往視。飲其藥。如有物積腹中。遂篤。帝



遣使護歸。居月餘卒。

五月遣中官趙成使河州。

自鈔法行。西番馬至者少。帝遣成齎羅綺及巴茶往河州市之。馬稍集中。官奉使自此始。

秋七月朔日食。詔百官奔喪。母俟報。○京師地震。○八月元擴廓帖木兒卒。

自徐達敗後。大軍不復出塞。擴廓從其主。徙金山。卒於哈刺那海之衙庭。其妻毛氏亦自經死。帝嘗大會諸將。問曰。天下奇男子誰也。皆對曰。常遇春。帝曰。遇春雖人傑。吾得而臣之。吾不能臣王保保。乃奇男子耳。保保。擴廓小字也。

九月遣湖廣參政吳雲使雲南爲所殺。

帝以雲南未下再遣使招諭。曾梁王使其臣鐵知院等使漠北爲官軍所獲。帝釋之。命與雲偕行知院等以已奉使被執且得罪。乃誘雲改制書詐爲元使者。給梁王雲以死拒。知院等殺之。

冬十月改都衛爲都司。

帝初置各都衛指揮使司節制方面。至是詔改爲都指揮使司。凡都司十有三。北平。陝西。山西。浙江。江西。山東。四川。福建。湖廣。遼東。廣東。廣西。河南。行都司三。西安。大同。建寧。十五年增置貴州雲南二都司。

十二月納哈出寇遼東。指揮使馬雲葉旺擊敗之。



帝以納哈出必內犯。勅雲等預爲備。未幾果至。見備禦嚴。不敢攻。越葢州。至金州。指揮韋富主勝等伏弩城下。禽其驍將。敵大沮。沿柞河遁。旺先引兵扼河。緣河壘冰爲牆。沃以水。經宿凝涸。如堅城。旁設坑。穿敵至。伏四起。納哈出急趨連雲島。遇冰城。旁走。悉陷。奔中。衆大潰。雲自城中出。合兵追擊。至畢栗河。斬獲無算。納哈出僅以身免。

九年春正月遣湯和帥師鎮延安。

元將伯顏帖木兒爲邊患。帝以和爲征西將軍。防延安。秋七月。伯顏帖木兒來犯。和使傅友德破禽之。降其衆。三月。免近畿及山西陝西河南福建江西浙江北平湖廣

田租。夏六月。改行中書省爲承宣布政使司。

浙江。江西。福建。北平。廣西。四川。山東。廣東。河南。陝西。湖廣。山西。諸行省。俱改爲承宣布政使司。罷行省平章政事。左右丞等官。改參知政事。爲布政使。置左右參政。後又增置左右參議。

秋七月朔日食。冬十一月下平遙訓導葉伯巨於獄。殺之。

時以災異求直言。伯巨上書略曰。臣觀當今之事。太過者三。曰分封太侈也。用刑太繁也。求治太速也。先王之制。大都不過三國之一。今秦晉燕齊梁楚吳蜀諸國。無不連城數十。異時尾大不掉。然後削其地而奪之權。則



必生缺望。願及諸王未之國之先。節其都邑。減其兵衛。限疆理。以待封諸王子孫。割一時之恩。制萬世之利。莫先於此。臣又觀歷代開國之君。未有不以任德結民心。以任刑失民心者。今用刑多裁。自聖衷治獄之吏。趨承意旨。深刻者多功。平反者獲罪。雖刪定舊律。減宥有差。然有寬宥之名。未見寬宥之實。所謂實者。誠在上不在下也。古之爲士者。以登造爲榮。今之爲士者。以溷跡無聞爲福。以受玷不錄爲幸。以屯田工役爲必獲之罪。以鞭笞捶楚爲尋常之辱。其始也。取天下之士。網羅摺撫。務無餘逸。有司敦迫上道。如捕重囚。比至除官。多以貌選所學。非所用。所用非所學。居官一有差跌。苟免誅戮。

則必在屯田工役之科率是爲常不少顧惜此豈陛下  
所樂爲哉誠欲人懼而不敢犯也竊見數年來誅殺亦  
不少矣而犯者相踵自今宜存大體赦小過昔者周自  
文武至於成康教化大行漢自高帝至於文景始稱富  
庶致治之道固不可驟今陛下切切於民俗澆漓人不  
知懼乃至令下而尋改已赦而復收天下臣民莫知適  
從甚不稱陛下求治之心也臣愚謂求治之道莫先於  
正風俗正風俗之道莫先於守令知所務風憲知所重  
今之守令不過具文案備照刷而已風紀之司不過聽  
訟讞獄而已非所以使民遷善遠罪爲治之大者也古  
者教士於學俊造遞升論定後官任官後爵故成周得



人爲盛。今天下諸生升太學者。未數月遽選入官。臣恐其人未諳時務。上乖國政。而下困黎民也。開國以來。選舉秀才。不爲不多。所任名位。不爲不重。自今數之在者。有幾。此皆求治太速之過。書上。帝大怒曰。小子間吾骨肉。逮下獄。瘐死。

十二月。遣元臣蔡子英歸和林。

子英。元至正中。進士。察罕辟爲參軍。累遷行省參政。元亡。從擴廓走定西。擴廓軍敗。子英單騎走關中。入南山。帝遣人繪形求得之。傳詣京師。至江濱。亡去。久之復被獲。械過洛陽。見湯和。長揖不拜。抑之跪不肯。焚火焚其鬚。不爲動。其妻適在洛。子英避弗見。至京。授以官。不受。

退而上書略曰。陛下以萬乘之尊。全匹夫之節。不降天  
誅。反療其病。易冠裳。賜酒饌。授以名爵。陛下之量。包乎  
天地。臣感恩無極。非不欲自竭犬馬。但名義所存。不敢  
輒渝初志。自惟身本韋布。知識淺陋。過蒙主將知薦。雖  
馬食肉。十有五年。愧無尺寸功。以報國士之遇。及國家  
破亡。又復失節。何面目見天下士哉。臣被獲以來。日夜  
思惟。咎往昔之不死。至於今日。分宜自裁。陛下待臣以  
恩禮。臣固不敢賣死立名。亦不敢偷生苟祿。若察臣之  
愚。全臣之志。禁錮南海。畢其餘命。則雖死之日。猶生之  
年。帝覽書。益重之。館之儀曹。忽一夜大哭不止。人問故。  
曰。思舊主耳。帝知終不可奪。命有司送出塞。從其故主。



於和林。

十年春正月。益秦晉燕三府護衛。○夏四月。遣鄧愈帥師擊吐蕃破之。

吐蕃川藏數剽貢使。帝命愈爲征西將軍。偕都督同知沐英討之。分兵三道窮追至崑崙山。俘斬萬計。留兵戍諸要害而還。

五月。詔韓國公李善長曹國公李文忠議軍國重事。○六月。詔臣民言事實封達御前。○秋七月。始遣御史巡按州縣。

俾詢民間疾苦。廉察風俗。申明教化。

九月。以胡惟庸爲左丞相。汪廣洋爲右丞相。陳寧爲左御

史大夫。

自楊憲誅。帝以惟庸才可倚。寵遇日盛。獨相數年。生殺黜陟。或不奏徑行。內外諸司上封事。必先關白。四方躁進之徒。及功臣武夫失職者。爭走其門。饋遺金帛名馬玩好。不可勝數。廣洋浮沉守位而已。寧有才氣而性褻刻。知蘇州。徵賦苛急。嘗燒鐵烙人。號爲陳烙鐵。以惟庸薦。擢御史中丞。至是拜大夫。

冬十一月。衛國公鄧愈卒。

追封寧河王。謚武順。愈事母孝。撫幼弟有恩。敬禮儒士。簡重愼密。有士君子之行云。

十二月朔日食。○錄功臣子孫。



年

都督府錄丁忠等五百十一人授指揮千百戶有差  
十一年春正月封子五人爲王。

椿爲蜀王。栢湘王。桂。豫王。煥。漢王。植。衛王。其後桂改封  
代。煥改封肅。植改封遼。

徵天下布政使及知府來朝。

命吏部課其殿最稱職無過者爲上。賜坐宴。有過稱職  
者爲中。宴而不坐。有過而不稱職者爲下。不預宴。序立  
於門。宴畢。然後退朝。覲考覈自此始。

三月詔奏事毋先白中書省。○夏四月元愛猷識里達臘  
卒。

子脫古思帖木兒立。帝遣使往弔。自爲文祭之。

御批通鑑輯覽卷之三  
秋七月。蘇松揚台諸府海溢。遣使賑恤。

十二年春正月。始合祀天地於南郊。

帝以分祀天地情有未安。乃作大祀殿於圜丘壇址。合祀天地。

遣征西將軍沐英擊洮州番。大破之。

洮州十八族番首三副使等叛。據納麟七站地。帝命英討之。復命李文忠往籌軍事。英至洮州舊城。寇遁去。追擊大破之。禽三副使等。築城東籠山。置洮州衛。文忠言官軍守洮州。餉艱民勞。帝曰。洮州西控番戎。東蔽湟隴。漢唐以來。備邊要地。今番寇旣斥。棄之不守。數年後將復爲患。慮小費而忘大虞。豈良策哉。卒置衛守之。



平羗將軍丁玉擊松州番平之

松州平王遣指揮高顯城之遂併潘州於松州置松潘衛明年帝以松州遠在山谷屯種不給命罷之未幾指揮耿忠經略其地言松州爲番蜀要害地軍衛不可罷乃命復置

夏四月給致仕官誥勅復其家○秋七月以李文忠領大都督府事○冬十二月賜汪廣洋死

廣洋與胡惟庸同相惟庸所爲不法廣洋知而不言御史中丞涂節言劉基遇毒死廣洋宜知狀帝問之對曰無有帝怒責廣洋欺罔貶海南舟次大平賜死

徵元吏部侍郎伯顏子中子中飲鳩卒

子中初爲建昌教授。江西盜起。授分省都事。使守贛州。而陳友諒兵已破贛。子中間道走閩。陳友定素知之。辟爲行省員外郎。子中出奇計。收復建昌。浮海如元都。獻捷。累遷至吏部侍郎。持節發廣東。何真兵救閩。至則真已降於廖永忠。子中墮馬求死。不得。折其一足。永忠釋之。乃變姓名浪迹江湖間。帝求之不得。簿錄其妻子。子中竟不出。常齋鵠。自隨誓不復仕。至是江西布政使沈立本言於朝。以幣聘。子中慨然曰。死晚矣。爲歌七章。哭其祖父師友。飲鵠死。

庚申  
十三年春正月。胡惟庸謀反。及其黨陳寧。涂節等皆伏誅。惟庸貪賄弄權。無所畏忌。其定遠舊宅井中。忽生石筍。



出水高數尺。諛者爭言瑞應。又言其祖父塚上夜有光。惟庸益喜自負。有異謀。吉安侯陸仲亨自陝西歸。擅乘傳平涼。侯費聚奉命招降蒙古。無功。帝皆切責之。二人懼。惟庸陰以權利脅誘之。令在外收輯軍馬。又與陳寧坐省中。閱天下軍馬籍。令都督毛驤取衛士劉遇賢亡命魏文進等爲心膂。太僕寺丞李存義者。太師善長弟。惟庸壻李佑父也。惟庸令陰說善長。善長驚悸曰。爾言何爲者。若爾九族皆滅。後十餘日。惟庸又令存義告善長。善長不能制。惟庸乃遣指揮林賢下海招倭。與期會。又遣元故臣封績致書稱臣於元。請兵爲外應。事皆未發。會惟庸子馳馬於市。墜死車下。惟庸殺輓車者。帝怒。

惟庸請以金帛給其家。不許。惟庸懼。乃與御史大夫陳寧、中丞涂節等謀起事。既而節見事不成。遂上變告。帝大怒。命羣臣更訊誅惟庸。寧以節本預謀。并誅之。善長仲亨置不問。

罷中書省。改大都督府爲五軍都督府。

帝懲惟庸亂政。罷丞相。以政歸六部。分大都督府爲中左右前後五府。征調則隸兵部。後復勅諭羣臣。國家罷丞相。設府部院寺。分理庶政。事權歸於朝廷。立法至爲詳善。以後嗣君毋得議置丞相。臣下敢以請者。寘重典。始南北更調用人。

北平。山西。陝西。河南。四川。人。於浙江。江西。湖廣。直隸。用。



之浙江。江西湖廣直隸人。於北平山東山西陝西河南四川廣東廣西福建用之。廣西廣東福建人亦於山東山西陝西河南四川用之。考覈不稱職。及以事降謫者。不分南北。悉於廣東廣西福建汀漳江西龍南安遠湖廣郴州之地選用。

沐英襲元將脫火赤於亦集乃路禽之。○三月燕王棣之國。○夏四月命羣臣各舉所知。○五月雷震謹身殿。○詔免天下今年田租。○六月雷震奉天門。

帝避正殿省愆。罷王府工役。

秋八月詔天下學校師生日給廩膳。○九月置四輔官。

帝以密勿論思不可無人。乃建四輔官。以四時爲號。詔

天下舉賢才。戶部尙書范敏薦耆儒王本等召至。告於太廟。以本及杜佑、龔敦爲春官。杜敦、趙民望、吳源爲夏官。秋冬官缺。以本等攝之。俱兼太子賓客。位列公侯都督之次。勅以協贊政事。均調四時。旣而敦等相繼罷。本坐事誅。此職遂廢。

冬十月。安置翰林學士承旨宋濂於茂州。道卒。

濂傳太子十餘年。一言動。必以禮法諷諭。使歸於道。至有關政教及前世興亡事。必拱手曰。當如是不當如彼。太子每歛容嘉納。至是其孫慎坐。胡惟庸黨被刑。籍其家。械濂至京。帝怒欲誅之。皇后以濂親授教太子。諸王乞赦其死。帝意解。發茂州安置。行至夔州。以疾卒。



辛酉

十四年春正月元兵侵邊命徐達禦之。

乃兒不花侵邊命達帥湯和等討之獲全寧四部以歸達仍鎮北平自是每歲春出冬暮召還以爲常。

定賦役籍

詔天下編賦役黃冊以一百十戶爲一里推丁糧多者十戶爲長餘百戶爲十甲歲役里長一人董一里一甲之事先後以丁糧多寡爲序鰥寡孤獨不任役者附十甲後爲畸零每十年有司更定其冊以丁糧增減而升降之二十年復命國子生分行州縣隨糧定區區設糧長四人量度田畝方圓次以字號編類爲魚鱗圖冊黃冊以戶爲主魚鱗冊以土田爲主魚鱗冊爲經土田之

德義集卷之三  
三  
訟質焉。黃冊爲緯。賦役之法定焉。

三月赦。○秋九月。遣傅友德征雲南。

以友德爲征南將軍。藍玉沐英副之。步騎三十萬。

冬十月朔日食。○制法司錄囚。會翰林春坊官。給事中。集議以聞。○十二月。令翰林春坊官。考驗諸司章奏。○傅友德下曲靖。元梁王把匝剌瓦爾密死之。雲南平。

大軍由辰沅趨貴州。克普定。普安。梁王遣司徒平章達里麻將兵十餘萬屯曲靖以備。沐英謂友德曰。彼不意我師深入。若倍道疾趨。出其不意。破之必矣。友德是之。遂進師。未至曲靖數里。忽大霧四塞。衝霧行。阻水而止。則已臨白石江矣。霧霽。達里麻大驚。友德欲渡。英曰。我



兵疲恐爲所扼。乃帥諸軍嚴陳。若將渡者。而奇兵從下流濟。出其陳後。張疑幟山谷間。人吹一銅角。元兵驚擾。英急麾軍渡江。縱鐵騎擣之。生禽達里麻。俘獲萬計。友德自率衆擊烏撒。分遣藍玉。沐英趨雲南。梁王聞敗。度不能支。乃走普寧州之忽納砦。驅妻子赴滇池死。與其左丞達的。右丞驢兒俱自殺。師至雲南。右丞觀音保以城降。屬郡皆下。友德擊破烏撒蠻。遂城之。又克七星關。以通畢節。於是東川。烏蒙。芒部。水西諸蠻皆望風附。明年春。藍玉。沐英進攻大理。拔之。禽其酋段世。分徇鶴慶。麗江。金齒皆下。雲南悉平。

戊午

十五年夏四月。殺大理寺卿李仕魯。

帝頗好釋氏教。詔徵東南戒律僧。數建法會於蔣山。應對稱旨者。輒召入禁中。賜坐講論。時寄以耳目。諸僧怙寵。請爲釋氏創立職官。於是設左右善世闡教等。皆高其品秩。道教亦然。仕魯疏言。陛下方創業。意指所向。卽示子孫萬世法程。奈何舍聖學而崇異端。章數上不聽。仕魯性剛介。以闢佛自任。及言不見用。遂乞骸骨。置笏帝前。帝大怒。命武士摔搏之。立死階下。

免畿內浙江江西河南山東田租。口置錦衣衛。

初置拱衛司。管領校尉。三年改爲親軍都尉府。而設儀鸞司。隸之。至是罷儀鸞司。改置錦衣衛。

五月。帝詣國子監。釋奠於先師。



帝初以應天府學爲國子學。至是改學爲監。分六堂以館諸生。厚給廩餼。歲時賜布帛文綺。諸令節俱賞節錢。流廣平府吏王允道於嶺南。

允道請開磁州鐵冶。帝曰。朕聞治世無遺賢。不聞無遺利。今軍器不乏。若復設此。必重擾民。杖之。流海外。秋八月。復行科舉。

三年。一行爲定制。時雖復行科舉。而監生與薦舉人才。參用者居多。嘗擢監生劉政等六十四人。爲布政按察使。及參政副使等官。或用爲御史給事中。而薦舉之途尤廣。賢良郭有道。秀才范敏。曾泰。稅戶人才鄭沂。儒士趙槃。皆起家爲尚書。其他由布衣登大僚者。不可勝數。

皇后馬氏崩

后勤於內治。暇則講求古訓。以宋多賢后。命女史錄其家法。朝夕省覽。或言宋過仁厚。后曰。過仁厚。不愈於刻薄乎。帝前殿決事。或震怒。后伺帝還宮。輒隨事微諫。帝爲緩刑戮。帝幸太學。還后問生徒幾何。帝曰。數千。后曰。人才衆矣。諸生有廩食。妻子何所仰給。帝遂立紅板倉。積糧賜其家。諸將克元都。俘寶玉至。后曰。元有是而不能守。意者帝王自有寶歟。帝曰。后意謂得賢爲寶耳。后拜謝曰。誠如陛下言。疾亟。帝問所欲言。曰。願陛下求賢納諫。慎終如始。子孫皆賢。臣民得所而已。崩年五十一。九月。葬孝慈皇后。○選僧侍諸王。



高后崩諸王奔喪將還帝命各以一僧與之令誦經修佛事吳僧道衍名在燕府籍中見燕王棣卽深相納數以奇謀進棣甚信任之

冬十一月置殿閣大學士

以禮部尙書邵質爲華蓋殿大學士翰林學士宋訥爲文淵閣大學士檢討吳伯宗爲武英殿大學士典籍吳沉爲東閣大學士又置文華殿大學士徵耆儒鮑恂余詮等爲之以輔導太子秩俱正五品當是時以翰林春坊詳看諸司奏啓兼司平駁大學士特侍左右備顧問而已

癸

十六年春二月始令天下學校歲貢士於京師○三月傅

子甲

友德師還。命沐英留鎮雲南。○復鳳陽臨淮二縣民世世無所與。○秋八月朔日食。

十七年春三月曹國公李文忠卒。

文忠器量沉宏。常師事金華范祖幹。胡翰。通曉經義。其釋兵家居。恂恂若儒者。帝雅愛重之。卒。追封岐陽王。謚武靖。

丑

秋七月。禁內官預外事。勅諸司毋通內官監文移。○盱眙人獻天書誅之。○冬十月。河南北平。水遣使賑之。○閏月。詔天下罪囚。刑部都察院詳議。大理寺覆讞。奏決。

十八年春二月。雷電雨雪。詔臣民極言得失。○太傅魏國公徐達卒。



達言簡慮精。屢爲大將。善拊循。與下同甘苦。士無不感。恩效死。尤嚴戢步伍。所平大都一省。會三郡邑百數。聞井宴然。歸朝之日。單車就舍。延禮儒生。談論終日。在帝前恭謹。若不能言。帝嘗稱之曰。受命而出。成功而旋。不矜不伐。婦女無所愛。財帛無所取。中正無疵。昭明乎日月。大將軍一人而已。卒。追封中山王。謚武寧。

二月。始選進士入翰林。及爲庶吉士。

帝廷試進士。擢一甲丁顯等爲翰林院修撰。二甲馮京等爲編修。吳文爲檢討。命進士觀政於諸司。其在翰林院。承敕監中書六科者。曰庶吉士。在六部都察院諸司者。仍稱進士。永樂二年。乃定制。以庶吉士專屬翰林。

秋七月遣使封高麗國王王禰。

禰屢上表請襲爵并乞故王謚乃遣使封之賜故王顯謚恭愍。

冬十月頒大誥於天下。

帝患民徂元習徇私滅公乃輯官民過犯條爲大誥其目有十頒學宮以課士里置塾師教之囚有大誥者罪減等其後復命刑官撮大誥條目要略附載於律謂之律誥而大誥所載諸峻令未嘗輕用云。

十一月免河南山東北平湖廣田租。十二月平緬宣慰使思倫發叛。

思倫發寇景東都督馮誠禦之天大霧官軍失利千戶



王昇戰死。

十九年夏六月詔有司存問高年。

貧民年八十以上月給米五斗酒三斗肉五斤九十以  
上歲加帛一疋絮十斤有田產者罷給米應天鳳陽富  
民年八十以上賜爵社士九十以上鄉士天下富民年  
八十以上里士九十以上社士皆與縣官均禮復其家  
冬十二月朔日食

續資治通鑑長編卷一百一十五

日  
フ  
州  
密  
エ  
一  
ナ  
ク



御撰資治通鑑綱目三編卷三

起丁卯明太祖洪武二十年盡  
戊寅明太祖洪武三十一年

凡十二年

附

二十年春正月以馮勝爲征虜大將軍率師討納哈出。

元太尉納哈出擁衆數十萬屯金山數寇遼東帝以勝  
爲大將軍傅友德藍玉爲副率師二十萬討之遣前所  
獲元將乃刺吾還軍次通州聞元兵有屯慶州者藍玉  
乘大雪帥輕騎襲破之斬平章果來禽其子不蘭奚勝  
出松亭關分築大寧寬河會州富峪四城駐兵大寧  
焚錦衣衛刑具。

先是有罪囚逮至京收繫錦衣衛用事者非法凌虐帝  
聞之怒命取刑具悉焚之出繫囚送刑部詔內外獄咸

歸三法司。

夏六月。馮勝至金山。納哈出降。

乃刺吾歸見納哈出。述帝恩德。納哈出心動。遣使求獻馬。且覘軍勢。勝軍踰金山。降其部將全國公。觀童。納哈出度不敵。因乃刺吾請降。勝遣藍玉往受之。納哈出以數百騎至。王大喜。飲以酒。納哈出酌酒酬玉。玉解衣衣之。納哈出不肯服。玉亦不飲。爭讓久之。納哈出取酒澆地。顧其下咄咄語。鄭國公常茂在坐。其麾下解蒙古語者。密告茂。納哈出將遁矣。茂直前搏之。納哈出驚起。欲就馬。茂拔刀斫傷其臂。都督耿忠擁以見勝。納哈出將士十餘萬在松花河北。聞納哈出傷驚潰。勝遣觀童



諭降之得所部二十餘萬人還至亦迷河復收其殘卒  
三萬而餘衆竄匿者尙數萬都督濮英殿大軍還猝爲  
所乘被執引佩刀刺腹死納哈出至京師詔封海西侯  
秋八月召馮勝還詔副將軍藍玉領其軍

勝奏常茂激變狀械至闕會有言勝多匿良馬使聞者  
行酒於納哈出妻求大珠異寶王子死二日強娶其女  
失降附心而茂亦訐勝過帝怒收勝大將軍印命就第  
鳳陽奉朝請而安置茂於龍州

九月詔商稅毋定額

戶部言天下稅課視舊有虧宜以洪武十八年所收爲  
定額帝曰商稅多寡歲有不同限以定額豈不病民不

從

以藍玉爲大將軍帥師北伐。冬十一月命湯和築瀕海城備倭。

日本屢入寇帝患之謂和曰卿雖老強爲朕一行和請與方鳴謙俱鳴謙國珍從子也習海事帝訪以禦倭策鳴謙曰倭海上來則海上禦之耳請量地遠近置衛所陸聚步兵水具戰艦砦壘錯置其間則倭不得入入亦不得傳畝近海民四丁籍一爲兵無煩客兵也帝以爲然和乃度地浙東西置衛所並海築城五十有九選丁壯五萬八千餘人戍之。

二十一年春正月詔治有司匿災者罪



青州饑有司匿不以聞詔逮治之。且著爲令。

三月沐英討思倫發破走之。

思倫發寇定邊衆號三十萬英選騎三萬馳救置火礮  
勁弩爲三行蠻毆百象被用翼以標槍銳甚英分軍爲  
三都督馮誠居前都督同知甯正左湯昭右英與將士  
約有功者賞退衄者斬因乘風大呼礮弩並發象皆反  
走賊殊死鬪左軍少却英登高望之取佩刀命左右斬  
帥首來左帥見一人握刀馳下恐奮呼衝突大軍乘之  
斬馘四萬餘生獲象三十七賊帥各被百餘矢伏象背  
死思倫發遁去明年遣使入貢麓川平緬遂平。

夏四月藍玉襲破元脫古思帖木兒於捕魚兒海獲其子

御批通鑑輯覽卷三十三  
地保奴。

王以大軍出大寧至慶州聞脫古思帖木兒在捕魚兒海間道馳進至百眼井不見敵王欲還定遠侯王弼曰吾等提十萬衆深入至此無所得何以復命王曰然令軍士穴地而鑿毋見烟火乘夜馳至捕魚兒海黎明去敵營八十餘里時大風揚沙晝晦軍行無知者敵不設備弼爲前鋒大破之斬太尉蠻子等降其衆脫古思帖木兒以其太子天保奴等數十騎遁獲其次子地保奴及妃主以下百餘人官屬三千男女七萬馬駝牛羊十五萬奏捷京師帝大悅遣使齎勅勞王比之衛青李靖云



五月朔日食。○六月信國公湯和歸鳳陽。

帝春秋寢高。不欲諸將久典兵。未有以發也。和以間從容乞骸骨。帝大悅。賜鈔治第鳳陽。並爲諸公侯治第。至是第成。和築城海上。還率妻子陛辭。帝褒諭之。賜資甚厚。

秋七月。以解縉爲監察御史。

縉爲中書庶吉士。甚見愛重。一日帝諭之曰。朕與爾義則君臣。恩猶父子。當知無不言。縉卽日上封事萬言。略曰。臣聞令數改則民疑。刑太繁則民玩。國初至今。將三十載。無幾時不變之法。無一日無過之人。臣聞陛下鋤根剪蔓。誅其姦逆矣。未聞環一大善。始終勿替者也。或

朝賞而暮戮。或忽罪而忽赦。陛下每多自悔之時。此由存養之功少加密耳。若夫祀天宜復掃地之規。尊祖宜備七廟之制。奉天不宜爲筵宴之所。文淵猶未備館閣之隆。太常非俗樂可肄。官妓非人道所爲。禁絕倡優。易置寺閣。執戟墀陛。皆用俊良。勿興土木之工。勿貪四裔之地。減細縣省冗官。痛懲法外威刑。永革京城工役婦女。非帷薄不修。毋令逮繫。大臣有過惡當誅。不宜加辱。近歲臺綱不肅。以刑名輕重爲能事。以問囚多寡爲勲勞。御史糾彈。皆承密旨。每聞上有赦宥。則必過爲執持。意謂如此。則上恩愈重。此皆小人趨媚効勞之細術。陛下何不肝膽而鏡照之哉。陛下進人不擇於賢否。授職



不量於輕重。惟理器悍之夫。闕茸下愚之輩。朝捐刀鎗。暮擁冠裳。左棄筐篋。右綰組符。雖曰立賢無方。亦盍忱詢有德。古者善惡鄉鄰必記。今互知之法雖嚴。而訓告之力未備。臣欲求古人治家睦鄰之法。若古藍田呂氏鄉約。今義門鄭氏家範。布之天下。世臣大族。率先以勸。將見作新於變。至於比屋可封。不難矣。臣聞地有盛衰。物有盈虛。而商稅之徵率。皆定額。旣稅於所產之地。又稅於所過之津。何奪民之利如此密也。且多貧下之家。逃亡轉徙。無前日之生植。有前日之稅糧。或膏腴而稅反輕。瘠鹵而稅反重。此里胥之弊也。欲拯困而革弊。莫若行授田均田之法。兼常平義倉之舉。積之以漸。至有

九年之食無難者。夫連坐起於秦法。孥戮本於偽書。今爲善者妻子未必蒙榮。有過者里胥已陷其罪。况律以人倫爲重。而有給配婦女之條。聽之於不義。則又何取夫節義哉。同寅協恭。相倡以禮。今內外百司。捶楚屬官。甚於奴隸。是使柔懦之徒。蕩無廉恥。甚非所以勵風節也。臣但知罄竭愚衷。急於陳獻。所奏略無次序。惟陛下垂鑒。書奏。帝稱其才。尋改爲御史。

九月勅天下衛所屯田。

歲得糧五百餘萬石。

冬十月元脫古思帖木兒爲其下所殺。

脫古思帖木兒旣遁。將依丞相咬住於和林。行至土刺。



河爲其下也。速迭兒所襲衆遂散。獨與十六騎俱。咬住來迎。欲其往。依闊闊帖木兒。會大雪不得發也。速迭兒兵猝至。擒殺之。并殺天保奴。自脫古思帖木兒。五傳至坤帖木兒。咸被弑。不復知帝號。有鬼力赤者。篡立。稱可汗。去國號。遂稱韃靼云。

十二月安南黎季犛廢其王煒。尋弑之。

陳叔明立。三歲。傳其弟熾。熾死。弟煒代立。其相季犛竊柄廢煒。殺之。立叔明子曰焜。主國事。

三十二年春二月。禁武臣預民事。○湖廣千戶夏得忠作亂。靖寧侯葉昇討之。得忠伏誅。

得忠誘九溪洞蠻爲寇。昇同胡海等討之。潛兵出賊後。

掩擊擒得忠斬之置九溪永定二衛。

夏五月置泰寧朶顏福餘三衛。

三衛地爲兀良哈在黑龍江南元大寧路北境元遼王等內附帝卽其地置三衛俾部長各領其衆互爲聲援自錦義歷廣寧至遼河曰泰寧自全寧抵喜峰口近宜府曰朶顏自黃泥窪逾瀋陽鐵嶺至開原曰福餘獨朶顏地險而強。

秋九月朔日食。

庚

二十三年春正月命晉王桐燕王棣帥師北伐。

命傅友德等以北平兵從燕王王弼等以山西兵從晉王征咬住及乃兒不花。



河決歸德。

決歸德東南鳳池口。徑夏邑永城諸縣。發十衛士卒與歸德民并力築之。及秋又決開封。

三月燕王棣至迤都。元太尉乃兒不花等降。

棣出古北口。偵知乃兒不花營迤都。冒大雪馳進。去敵一磧。先遣指揮觀童往。觀童故善。乃兒不花至則相持泣。頃之大軍壓其營。乃兒不花驚欲遁。觀童止之。引見棣。賜酒食。慰諭遣還。乃兒不花喜過望。遂偕咬住等來降。二十五年。命元降軍赴北平。聽燕王調用。棣兵自此益強。

夏四月。潭王梓自焚死。

梓英敏好學。嘗會府僚設醴賦詩。品其高下。而賚予之。妃於氏。都督顯女也。顯與子琥坐胡惟庸黨誅。梓不自安。帝遣使召之。大懼。與其妃自焚死。

閏月。詔期服不得奔喪。

初。百官聞祖父母伯叔兄弟喪。俱奔赴。吏部言。一人或連遭五六期服。或道路數千。則居官日少。更易繁數。曠官廢事。莫此爲甚。請自今。期年服不許奔喪。從之。

五月。以楊靖爲刑部尙書。

靖鞫一武弁。門卒檢其身。得大珠。僚屬驚異。靖徐曰。儻也。安有珠大如此者。立碎之。帝聞歎曰。靖此舉。有四善焉。不獻朕以求容悅一也。不究其所投。獻息大獄二也。



不獎門卒。杜小人僥倖三也。千金之珠。猝然至前。斥以爲僞而碎之。有過人之智。應變之才。四也。

賜韓國公李善長死

先是善長弟存義安置崇明。善長不謝。帝銜之。至是善長年七十七。毫不檢下。嘗欲營第。從信國公湯和假衛卒三百人和以聞。四月。京民坐罪應徙邊。善長數請免其私親丁斌等。帝怒按斌。斌故給事。胡惟庸家。因言存義等往時交通惟庸狀。命逮存義鞫之。詞連善長。於是御史交章劾善長。坐以大逆。會星變。言者謂其占當移大臣。遂賜善長死。并殺其家屬七十餘人。子祺尙臨安公主。免死徙江浦。吉安侯陸仲亨。延安侯唐勝宗。平涼

侯費聚南雄侯趙廟河南侯陸聚宜春侯黃彬豫章侯  
胡美滎陽侯鄭遇春等皆同時坐惟庸黨死帝條列其  
罪作姦黨錄布告天下既而虞部郎中王國用上言善  
長與陛下同心出萬死以取天下勲臣第一生封公死  
封王男尚公主親戚拜官人臣之分極矣藉令欲自圖  
不軌尙未可知而今謂其欲佐胡惟庸使善長佐惟庸  
事成不過勲臣第一而已寧復有加於今日且善長豈  
不知天下之不可倖取當元之季欲爲此者何限莫不  
身爲齏粉覆宗絕祀善長胡乃以衰倦之年身蹈之也  
凡爲此者必有深讐急變大不得已或至相挾以求脫  
禍今善長子祺托陛下骨肉親無纖芥嫌何苦而忽爲



此若謂天象告變大。臣當災殺之以應天象。則尤不可。臣恐天下聞之。謂功如善長且如此。四方因之解體也。臣亦知善長已死。言之無益。願陛下作戒將來耳。秋八月。詔母以吏卒充選舉。○九月朔日食。○冬十二月。罷天下歲織文綺。

辛未

二十四年春三月朔日食。○夏四月。封子十人爲王。

紆爲慶王。權寧王。梗岷王。樞谷王。松韓王。模濟王。楹安王。桎唐王。棟郢王。櫟伊王。

秋八月。命皇太子巡撫陝西。○冬十月。以馮堅爲僉都御史。

堅南豐縣典史。上書言九事。一曰。養聖躬。清心省事。以

爲民社之福。二曰擇老成輔導諸王。使正色直言。以圖  
匡救。三曰務農講武。屯戍邊圉。以備不虞。四曰精選有  
司。旌別屬吏。使人勇於自治。五曰褒祀典。俾末俗有所  
興勸。六曰省宦寺。以防內權。七曰調易邊將。以防外患。  
八曰採廉能以懲貪墨。九曰增關防。以革奸弊。書奏。帝  
嘉之。稱其知時務。達事變。又謂侍臣曰。堅言調易邊將。  
則未然。邊將數易。則兵力勇怯。敵情出沒。山川形勢。無  
以備知。倘得趙充國。班超者。又何以數易爲哉。乃擢堅  
僉都御史。

十一月。皇太子還京師。

壬午  
十五年春正月。河決陽武。



旁浸十一州縣。

夏四月。皇太子標卒。

諡懿文。帝御東角門。召對廷臣。勵決。學士劉三吾進曰。皇孫正嫡承統禮也。帝意遂決。

建昌衛指揮使月魯帖木兒叛。命藍玉討誅之。

月魯帖木兒合德昌。會川。諸番。攻建昌。轉攻蘇州。玉遣四川指揮瞿能討之。至雙狼寨。擒其將。賊衆大潰。月魯遁。能督兵追捕。進至打冲河。又敗之。月魯走柏興州。玉遣百戶毛海誘縛其父子。送京師誅之。盡降其衆。

六月。西平侯沐英卒。

英沉毅寡言笑。好賢禮士。撫卒伍有恩。未嘗妄殺。在滇

百務具舉。簡守令課農桑。墾屯田百餘萬畝。滇池隘浚而廣之。通鹽井之利。以來商旅。疎節閭閻。民以便安。帝嘗曰。使吾高枕無南顧憂者。英之功也。卒追封黔寧王。諡昭靖。子春晟。相繼鎮雲南。

秋七月。高麗李成桂逐其君瑤而自立。

初。王禍欲寇遼東。使成桂繕兵。成桂遣兵屯艾州。以糧不繼而退。禍怒殺成桂之子。成桂還兵攻之。囚禍。立其子昌。未幾。又廢昌而立瑤。至是。遂逐瑤而自立。瑤出居原州。王氏自五代傳國數百年。至是絕。是冬。成桂請更國號。帝命仍古號曰朝鮮。

九月。立孫允熾爲皇太孫。○以方孝孺爲漢中教授。



孝孺少好學恒以明王道致太平爲已任十五年以吳  
沉爲召見帝喜其舉止端整謂太子曰此莊士當老其  
才禮遣還至是又以薦召至帝曰今非用孝孺時除漢  
中教授蜀王椿聞其賢聘爲世子師名其讀書之廬曰  
正學

冬十二月徵安陸知州余彥誠下吏尋釋之

彥誠以徵稅愆期逮州民楊么等伏闕乞留帝賜宴遣  
還么等亦預宴時帝操重典繩羣下守令坐小過輒逮  
繫其部民走闕下乞留旋遣還且加賞賚有因以超擢  
者

二十六  
二十六年春二月涼國公藍玉以罪誅

王有勇略數總大軍多立功帝遇之厚寢驕蹇自恣多  
畜壯奴假子乘勢漁獵管占東昌民田御史按問王捶  
逐御史北征還夜扣喜峰關關使不卽納王縱兵毀關  
入帝聞之不樂又有言其私元王妃者帝切責王王猶  
不悛及西征歸兼太子太傅而馮勝傅友德俱兼太子  
太師王攘袂大言曰我固不當爲太師耶比奏事多不  
聽益怏怏錦衣衛指揮將獄告王謀反廷鞫之獄詞云  
王與鶴慶侯張翼晉定侯陳桓景川侯曹震舳艫侯朱  
壽東堯伯何榮及吏部尚書詹徽戶部侍郎傅友文等  
謀爲變將伺帝出精田舉事獄具族誅之列侯以下坐  
黨夷滅者萬五千人于是元功宿將相繼盡矣



三月命晉王桐燕王棣節制山西北平軍事

詔二王軍中事大者方以聞宋國公馮勝潁國公傅友德並受節制

夏四月詔有司賑饑毋俟報○旱詔羣臣言事理缺囚○  
秋七月朔日食○九月以鄭濟爲左庶子王懃爲右庶子  
初東宮官屬缺命廷臣舉孝義篤行之士尙書嚴震直  
以浦江鄭氏對帝曰朕素知鄭更聞其里王氏力行鄭  
氏家法可用以勵天下濟懃遂並拜官

戶部奏是歲天下戶口之數

戶一千六百五萬二千八百六十口六千五百四萬五  
千八百十一

一

二十七年秋八月遣使修天下水利

帝諭工部陂塘湖堰可蓄洩以備旱澇者皆因地勢修治之乃分遣國子生遍詣天下督修水利凡開塘堰四萬九百八十七處

冬十一月賜賴國公傅友德死

友德身冒百死自偏裨至大將每戰必先士卒以故所至立功二十五年友德請懷遠田于畝帝不悅曰祿賜不薄矣復侵民利何居爾不聞公儀休事耶及是竟賜死未幾定遠侯王弼亦賜死

二

二十八年春正月西平侯沐春討越州蠻平之

越州蠻阿資恃險屢叛春與都督何福率師營越州城



北伏精兵道左以羸卒誘賊賊悉衆出伏起大敗之阿  
資仁山谷中春訓知所在樹壘斷其糧道已出不意擣  
其巢遂擒阿資斬之俘其黨越州平

二月賜宋國公馮勝死

帝春秋高多猜忌勝功最多數以細故失帝意遂賜死  
諸子皆不得嗣

秋八月信國公湯和卒

和晚年益爲恭慎入聞國論一語不敢外泄勝妾百餘  
病後悉資遣之所得賞賜多分遺鄉曲當時公侯諸宿  
將坐奸黨先後麗法稀得免者而和獨享壽考以功名  
終卒年七十追封東甌王謚襄武

九月頒皇明祖訓。

詔後世有言更祖制者以姦臣論。

二十九年春二月燕王棣帥師巡邊三月敗元兵於徹徹兒山又追敗之於兀良哈禿城而還。○秋八月殺監察御史王朴。

朴性鯁直數與帝辨是非帝怒命戮之及市召還諭曰汝其改乎對曰陛下不以臣爲不肖擢官御史奈何摧辱至此使臣無罪安得戮之有罪又安用生之臣今日願速死耳帝大怒趣命行刑過史館大呼曰學士劉三吾志之某年某月日皇帝殺無罪御史朴也竟戮死。

三十年夏五月朔日食。○秋八月沔縣吏高福興作亂征



西將軍耿炳文討誅之。○九月平緬蠻刀幹孟逐其宣慰使思倫發詔沐春討之。

刀幹孟攻騰衝思倫發走雲南帝命春與何福等討之先以兵送思倫發於金齒檄幹孟來迎不應乃遣何福等將兵五千踰高良公山直擣南甸大破之斬其酋刀名孟回軍擊景罕寨賊憑高堅守官兵糧且盡福告急春帥五百騎救之乘夜渡潞江連破二寨幹孟乞降帝不許

戊寅  
三十一年夏閏五月帝崩太孫允熾卽位。○葬孝陵。○六月詔省州縣汰冗員。○戶部侍郎卓敬請徙封燕王棣於南昌不聽。

敬密疏言燕王智慮絕人。酷類先帝。北平形勝地。土馬精強。金元所由興。宜徙封南昌。萬一有變。亦易控制。奏入。翌日召問。敬叩頭曰。臣所言。天下至計。願陛下察之。事竟寢。

召方孝孺爲翰林院侍講。

帝好讀書。每有疑。卽召孝孺講解。臨朝奏事。臣僚面議可否。或命孝孺就展前批。令之。

以齊泰爲兵部尙書。黃子澄爲太常卿。參預國事。

泰爲兵部侍郎。太祖嘗問邊將姓名。泰歷數無遺。又問諸圖籍。出袖中手冊。以進。簡要詳密。大奇之。子澄初爲東宮伴讀。帝嘗坐東角門。謂曰。諸王尊屬。擁重兵。多不



法奈何。對曰：諸王護衛兵僅足自守，倘有變，臨以六師，其誰能支？漢七國非不强，卒底滅亡，順逆之理異也。帝即位，遂命泰與子澄同參國政。時燕、周、齊、湘代岷諸王相煽動，流言聞於朝。帝謂子澄曰：先生憶昔東角門之言乎？對曰：不敢忘。

秋七月，周王橐有罪，廢爲庶人。

齊泰與黃子澄謀欲先圖燕。子澄曰：不然。周、齊、湘代岷諸王在先帝時尚多不法，削之有名。今欲問罪，宜先周。周，燕之母弟，削周是剪燕手足也。謀定，入白帝。會有言周王橐不法者，遂命曹國公李景隆帥兵襲執之。宸蒙化，諸子皆別徙，已復召還京，錮之。



八月。西平侯沐春卒於軍。

春在鎮七年。大修屯政。闢田三十餘萬畝。鑿鐵池河。灌宜良。涸田數萬畝。民復業者五千餘戶。至是卒於軍。詔何福領其衆。

冬十月。熒惑守心。○十二月。賜天下明年田租之半。○都督何福擒刀幹孟斬之。

沐春既卒。賊復懷貳。福率兵討之。擒斬刀幹孟。思倫發始歸平緬。

以張昺爲北平布政使。謝貴。張信。爲都指揮使。

時燕王稱疾不出。廷臣謀削燕。乃更置守臣。使察其陰事。



